

Ministro Charro Kelly:

PROYECTO DI DUMP TA ALIVIO PA PARKIETENBOS

ORANJESTAD (AAN) Ministro Pedro Kelly tabata sumamente satisfecho cu pronto su deseo grandi



pa soluciona e problema di dump na Parkietenbos lo ser realiza. E lo trece un alivio grandi pa e vecindario cu pa basta aña caba ta sufri di un situacion desagradable. Ainda no por bisa ki tempo e proyecto nobo pa dump lo cuminza, pero si cu e ta basta avansa. E deseo grandi di Ministro Kelly ta pa e inicia pronto, esta e

aña aki mes.

DIARIO a logra un entrevista cortico cu Ministro Pedro (Charro) Kelly di D.O.W., kende ta e motor grandi tras di e proyecto pa un dump nobo y moderno pa Aruba.

Segun Ministro Kelly, ambtenaarnan cu ta vigila dump na Parkietenbos a nota cu e dump ta hopi yen y pronto lo no tin mas lugar pa deposita sushi.

Ministro Kelly a pidi un comision pa selecciona varios sitio cu por sirbi pa traha un dump nobo. Tres caminda a ser selecciona y presenta na gobierno.

Despues di a studia e proposicionnan, a yega na e decision cu ta mihor mantene e dump actual, pero den un mihor forma di loke e ta actualmente.

Ministro Kelly a sigui bisa cu mester sana e dump pa laman no ser contamina cu sushedad.

Mester traha un bon dique pa mantene e sushi for di laman, pa proteha medioambiente. Alavez e dump mester ta capacita y bon equipa y cu mantencion pa evita raton, djaca of insectonan.

Gobierno a pidi ayudo tecnico for di Hulanda pa asisti riba e tereno di dump y medio ambiente sin desacredita e ambtenaarnan cu ta den servicio.

Segun Ministro Kelly, lo haci e dump un sitio cu bo no ta imagina cu ta riba un dump bo ta. Sistema moderno cu lo tapa e sushi cu santo of otro materialnan lo ser usa.

E proyecto no ta completamente cla ainda pa publicidad pero e ta riba un bon

caminda, Ministro Kelly a duna di conoce.

E Ministro ta contento cu pronto su deseo grandi pa un mihor Aruba, un Aruba sano y cu bon medio ambiente ta yegando y cu esaki lo ta dentro di poco tempo mas. E lo alivia asina e situacion di bida di e habitantenan den cercania di e dump.

Esaki ta un proyecto cu pa basta tempo caba Ministro Kelly a bin ta traha ariba dje cu e deseo di alivia e pueblo di Simeon Antonio y vecindario. E bario ey a sufri pa basta aña caba cu e situacion desagradable ey.

Definitivamente e ta un proyecto cu ta beneficia Aruba, ya cu polucion meser ser evita pa e generacionnan cu ta bin. Pronto lo mira inicio di e proyecto aki.